



transport

Department:
Transport
Province of KwaZulu-Natal

**INKULUMO YENHLOKO YOMNYANGO WEZOKUTHUTHA KWAZULU-NATAL
UMNUZ SIBUSISO GUMBI ENKONZWENI YESIKHUMBUZO KWADABEKA
NGOLWESINE MHLAKA 27 AUGUST 2015**

- Mphathi wohlelo;
- Abefundisi;
- Amakhansela wonke akhona;
- Imboni yokuthutha umphakathi;
- Ubuholi bonke obukhona ngezigaba ezahlukene;
- Abamele iminyango kahulumeni;
- Iminden iethintekile okuyiyona engosingaye;
- Umphakathi wonke;
- Ngiyanibingeleta egameni leNkosi yethu uJesu Kristu.

Sifisa ukuqala ngokuxolisa egameni likaMhlonishwa uMacingwane ophathiswe uMnyango wezokuThutha ongakwazanga ukuba yingxenye yale nkondo ngenxa yokubambeka kwezinye izinto.

Masibonge-ke kakhulu emindenini yalaba abasishiyle, ngokusivumela njengoMnyango noHulumeni waKwaZulu-Natal ukuba sihlele le nkondo ehlanganyele yesikhumbuzo sabantu bakithi abasishiye kabuhlungu ngeSonto.

Siyabonga nakomakhelwane nomphakathi wonke oshiye konke obuzokwenza ngalolu suku wathi mawuze uzozimazisa kule nkondo sibhonge emswanini ndawonye sonke.

Siyazi ukuthi noma engekho amagama anele ukuqedo ubuhlungu obuzwiwa amalungu eminden iengoba kuwona kufana nokuthi kuxebuke inyama uqobo, kodwa

njengabantu siyakholwa ukuthi uma umuntu ethola ukwesekwa noma yingayiphi indlela uma esosizini lokho kuyawenza umehluko nasengqondweni yakhe.

Uma sihambele izinkonzo zalolu hlobo siyaye sithande ukuchaza ukuthi lezi zinkonzo ziuhlelo lukaHulumeni lokungenelela ngokusiza uma kudlule emhlabeni abantu abayisihlanu kuya phezulu engozini eyodwa emgwaqeni.

Lokhu sikwenza ngokuthi sixhumane neminden iethintekile ukuthola ukuthi hlobo luni losizo oludingekayo bese kuvunyelwana ngokuthi sibe nenkonzo yesikhumbuzo noma kube yinkonzo yomngcwabo ehlanganise iminden njengoba silapha nje namhlanje.

Nalapha nje kuthe uma kuzwakala ngale nhlekelele salikhipha ithimba loMnyango elibe selihlanganisa amakhanda neminden, ebe isisinikeza leli langa ukuba sihanganye kule nkonz.

Kodwa futhi siyaye sikugcizelele ukuthi lokungenelela kwethu akuwuthathi kancane nomthelela omubi owenziwa ngukufa kwabantu ngamunye noma ngababili kwezinye izingozi zomgwaqo. Okusempeleni, sihlale shiso ukuthi "ukufa komuntu oyedwa emgwaqeni wethu ngukufa kwabaningi."

Yingakho-ke futhi ngaphezulu kokududuza iminden elahlekelwe, siphinda sithande ukuthi siqwasisane ngalezi zingozi zomgwaqo ezenza umonakalo omkhulu emindenini yethu.

Izingozi zomgwaqo ezithatha abantu bakithi ngendlela ebuhlungu bengagulanga beyimiqemane, abanye bephume emakhaya beyozamela iminden yabo isinkwa kodwa esikhundleni saleso sinkwa iminden ithole imibiko yokuthi angeke isaphinda ibabone.

Thina esisebenza kulo Mnyango nabakwezinye izinhlaka ezibhekelle inhlalakahle yomphakathi, luyisimanga usizi esilubonayo uma sesihambele iminden esuke ishiywe ngabantu ezingozini zomgwaqo, kokunye okuba yizingane esezele ziyizintandane esezipinga ukunakekelwa.

Kokunye kuphuma izibalo nje zokuthi mhlambu kubhubhe abantu abahlanu engozini, kodwa kungabe kusavezwa ukuthi bonke labo bantu ngabandawonye okusho ukuthi kungenzeka ukuthi kuvalwe ngehlahlha emndenini owodwa.

Njengoba silapha namhlanje siyayibona lento engikhuluma ngayo, lapho abantu ababili behambe nezingane zabo ezimbili. Cabanga-ke isimo esikule minden i namhlanje.

Ekugcineni zonke lezi zingozi esikhuluma ngazo zidla izwe lethu imali engaphezulu kuka-R300 billion ngonyaka. Uma sibheka igebe esisenalo kwezentuthuko, kuyacaca ukuthi le mali ngabe yenza okuningi ukushintsha izimpilo zabantu bakithi.

Le mali ivela kanjani na? Angithi phela ngemuva kwengozi kuba nabantu abadinga ukwelashwa, enye imali eningi iya kwabezimo eziphuthumayo, ama-ambulensi, kokunye okuye kudingeke ngisho indiza enophephela emhlane ezophuthumisa umuntu esibhedlela, okuyinto ebiza kakhulu leyo.

Laphaya ezibhedlela bathi uma umuntu elaliswe egumbini esithi i-ICU, noma i-intensive care unit, lapho umuntu olimele kanzima noma ogula kakhulu esuke ethola khona ukunakekelwa okunzulu, ukulala lapho nje umbhede awubizi ngaphansi kuka-R2 000 ngosuku.

Le mali ayihlangene nezindleko zokwelapha, okuya ngokuthi yini okumele yenziwe kumuntu kokunye okungafinyelela nangaphezulu kuka-R20 000 ngosuku. Ngitsheleke uma ezohlala e-ICU mhlambe izinsuku ezilishumi bese eyadlula emhlabeni, kusho ukuthi yonke leyo mali isihambile.

Kuphinda kube nabanakekelwa ngezibonelelo, ama-grant, okungaba yibona uqobo abalimele noma izingane zabo uma beshonile abazali. Enye iphuma ngezinxephezeloz e-Road Accident Fund, njengoba nalapha sikhuluma ngohlelo lokulekelela ezindlekweni zokungcwaba ngosizo Iwaso lesi sikhwama.

Ngaphezulu kwalokho, izingozi zisithathela abantu abasha abasabhekwe ukuba babambe iqhaza ekukhulisweni komnotho wezwe lethu. Nalapha nje ngiyabona ukuthi kuhambe abantu abasebancane esikhala kakhulu ngabo ngoba bekusamele basebenze bakhe umnotho.

Njengoba silapha nje, ngeviki eledlule besiKwaDukuza lapho kushone abantu abangu-16 engozini engicabanga ukuthi sonke sezwa ngayo lapho itekisi yakhalakathela kujantshi kanti kuzoqhamuka isitimela kwaduma izulu.

Ngaphambi kwalokho besiphuma eMnambithi lapho sasingcwaba abantu abayisithupha abaphelele engozini ebandakanya imoto encane neloli.

Ngenyanga edlule sasiseBulwer lapho kwakushone abantu abangu-8 engozini yetekisi neloli. Kulabo bantu kwakunengane enezinyanga ezine, okudabukisayo futhi ukuthi unina owayengeniswe esibhedlela naye wagcina eseshonile okwenza babe ngu-9 abashona kuleyo ngozi.

Okusethusa kakhulu ngukuthi konke lokhu kwenzeka nje, esikhathini esifushane esedlule bese sibona kunokwehla kwezingozi ikakhulukazi eziyiziphihl kanjena, njengoba manje sesiqala ukuba nalezi zinkonzo zilandelana.

Uma sibheka izibalo zikaJuly sithola ukuthi ngonyaka odlule saba nezingozi ezingu-166 kwadlula emhlabeni abantu abangu-198, kanti ngalo nyaka sibe nezingozi ezingu-167 kwashona abantu abangu-189 ngenyanga kaJuly kuphela.

Uma ubheka lapha-ke uzobona ukuthi muncane kakhulu umehluko wokwenza kangcono.

Lokhu kwenzeka kade eminyakeni emibili edlule sithole ukuthi sesehlise ngaphezulu kuka-30% ukufa kwabantu emigwaqeni yethu kulesi sifundazwe njengoba sibheke ukwenza okungenani u-50% ngo-2020 ngokwezimiso ze-United Nations.

Konke lokhu esikuvezayo bazalwane senzela ukuthi nazi ngesimo esibhekene naso sonke njengomphakathi noHulumeni. Kodwa okubalulekile engithanda sivumelane ngakho namhlanje ngukuthi yinina njengomphakathi okumele nenze okuthile, nivume ukuba nisizakale ngalokho uhulumeni akwenzayo ukuze niphephe.

Ngisho ngoba phela siyazi sonke ukuthi akukho uHulumeni angakwenzi ukulekelela abantu ukuba baphephe emigwaqeni kodwa kujike kube yibona abangabambisan noHulumeni – bashaye indiva yona le mithetho ebekelwe ukusiza bona.

Awubheke nje ngoba ezeni lonke akekho umuntu ogunyazwa ukuba ashayele imoto engaqalanga wafunda yonke imithetho nezimpawu zomgwaqo ukuze kube nesiqiniseko sokuthi ngeke enze ingozi emgwaqeni.

Eminye yale mithetho ithi awulokothi ushayele imoto uphuze utshwala.

Uma umuntu esefundile waphasa wathola igunya lokushayela, ukhohlwa yiyo yonke le mithetho ikakhulukazi lona osuqede abantu othi ongashayeli uphuzile.

Uhulumeni uphinda akhe imigwaqo eminye ayifake itiyela ngemali eshisive, ayifake nezimpawu zokuxwayisa ngokungaba yingozi uma ushayela, kufakwe namabhodi akutshela umgomu wejubane okumele uhambe ngalo kuleyo ndawo.

Kodwa mihi namalanga singcwaba abantu abashonele emgwaqeni ngenxa yokushayela bedakiwe nokugijima ngokwecile nokungalandeli izimpawu ezibekiwe.

Ngenxa yokwephulwa kwale mithetho, uHulumeni uphinda achithe imali eningi eqequesha aphinde aholele amaphoyisa azogada izephulamthetho emgwaqeni.

Ngenyanga kaJune nje laphaya eKolishi lamaphoyisa omgwaqo eMgungundlovu kunamaphoyisa angu-91 akhishiwe aseqalile ukusebenza emgwaqeni ngemuva kwezinyanga ezingu-12 zokuqeleshwa kanzima.

Nakuzwelonke ziyaqiniswa ezokuphepha ngokushaywa kwemithetho njengoba manje sekuphoqelekile ukuba izingane ezingaphansi kweminyaka emithathu zibekwe esihlalweni sazo esiboshelwe emotweni ukuze ziphephe.

Ngakho-ke siyayinxusa-ke imiphakathi yakithi ukuba ibambisane noHulumeni ijoyine imikhankaso yokuphepha emgwaqeni ngaso sonke isikhathi. Masiqaphele ukuthi izithuthi esizigibelayo nabashayeli bazo basesimweni futhi asilayishwa ngokwecile.

Egameni likaHulumeni waKwaZulu-Natali sifisa ukududuza imindeni yalaba:

1. Nelly Dlamini (27)
2. Sibusiso Dlamini (3)
3. Nana Mbhele (40)
4. Asakhe Mbhele (5)
5. Micheal Nzimande (58)

Imiphefumulo yabo sengathi ingalala ngoxolo!

Masibonge nakubo bonke ababambe iqhaza ngezindlela ezahlukene ukuba kusizakale imindeni eshonelwe, sithi ningadinwa nangomuso.

Sibonge nokuzinikela kweSANTACO ekusizeni lapho ingasiza khona. Siyazi ukuthi ngempela kuthatha kube nzima uma wazi ukuthi umonakalo onjeni uthinta wena.

Kodwa siyethemba ukuthi izigameko ezinjena yizona ezsivula amehlo ukuba sibone lapho kumele siqinise khona ukuze singalokhu sishaywa yinduku eyodwa.

Nathi siphinde sizibongele ngethuba sithembe ukuthi iNkosi izosigcina siphephile ezingozini zomgwaqo kusuka manje size sibone uKhisimusi nonyaka ozayo ka-2016 neminye elandelayo.

Ngiyabonga